

AKASHVANI AIZAWL

REGIONAL NEWS UNIT



CM

Assam Rifles chhuahsan ram hlutna hu Mizoram sawrkar in a pek tur Cheng Vaibelchhe 5.23 chu pe lo tur in Sawrkar Laipuiin a ngaidam tih Chief Minister Pu Lalduhoma chuan a tarlang.

He thu hi vawiin khan Chief Minister Pu Lalduhoma chuan Instagram ah tarlangin, Nikuma Union Minister for Home Affairs Pu Nitiyand Rai hna D.O Letter a thawn chu a rawn chhan let thu leh , Assam Rifles chhuahsan ram hlutna Mizoram sawrkarin a pek tur chu pek a ngaih loh tur thu a dawng tih a tarlang a. Sawrar laipui tan ui tham nia a lan loh avang leh State rethei tana hautak tham a nih avangin ngaidam mai tura a dilna chu tih hlawhtlin a niih tak avangin lawmawm a tih thu a sawi a ni.



CADC

Chakma Autonomous District Council-a thuneihna inchuhna karah Mizoram Larsap Gen (Rtd) Vijay Kumar Singh chuan CADC thuneihna thla ruk chhung atana a laksak hnuah thla ruk dang a pawt sei a, Lawngtlai DC chu CADC enkawl turin a ti.

District Council and Minority Affairs thuchhuah tarlan danin Larsap hian CADC a thuneihna inchuh avangin nikum 2025 July ni 7 khan CADC thuneihna chu thla ruk chhung atan a lak sak a, Lawngtlai DC chu CADC enkawl tura tih niin thla 6 chhunga thuneihna a laksak hun hi a zawh hnuah Larsap chuan thla 6 dang a pawt sei leh a ni.



SPORTS MINISTER

Sports Minister Pu Lalngchinglova Hmar chuan Infiamna leh politics inpawlh a tha lo tih sawiin politics khelh nana infiamna hmang lo turin mipuite a sawm.

Nizan khan Champhai District-a Lianpui Community Hall ah Tuipuiral Games & Sports Association (GSA) buatsaih Tuipuiral Annual Sports Meet vawi 53-na chu hawngin Minister chuan infiamna discipline hrang hrang tih hmasawn zel an tum thu a sawi a, infiamna chu politics khelh nana hmang lo tura chah in sports leh politics inpawlh a that loh thu a sawi.

Minister chuan Tuipuiral GSA ruahmanna a tha a tih thu sawiin infiam mi 500 chuang an mikhual thei hi a ropui a tih thu a sawi a. hmathlir thu tak neia hmasawn tum zel turin thalaite a chah bawk.



LADC

Lai Autonomous District Council-a Party mala Sorkarna siam thei an awm loh avanga ZPM leh MNF inkawpin Sorkar siam tuma hma an lakna a zuzi hnu ah, Member 8 nei MNF leh Member 7 nei Congress ten United Legislature Party dinin, Governor hnen ah Sorkarna an siam theih thu January 9 khan an thlen.

MNF leh Indian National Congress inkawp United Legislature Party chuan an hruaitu atan MNF Member, Lawngtlai Chandmary bialtu MDC Pu C. Lalsawmzuala an thlang a, nimin khan MNF District Hqrs. Lawngtlai Office hawna leh chhung inkhawmah Pu C. Lalsawmzuala chuan Congress nena sorkarna an siam dun tur ah Aizawla lama an hotute an lawm hle niin a sawi a. Sorkar kalzel dan turah leh CEM approval chungchangah pawh theitawp an

chhuah thu sawiin, mi thenkhatin ZPM leh BJP an inzawm a, CEM approval hi a chhuak thei dawn lo tiin thu an thehdarh mek ati a, an hotute hmalakna zarah Approval chu a chhuah ngei an beisei a ti bawk.

(Lalngjeta Ralte PTC Lawngtlai)



LAWNGTLAI MOCK DRILL

Vawiin khân DC Conference Hall, Lawngtlaiah chhiatrupna thlen thulha chet lâk dan entirna tura inbuatsaihna atân thutkhawm a ni.

Lawngtlai DC Pu Donny Lalruatsanga chuan Mizoram chu lirnghing tawk thei reng dinhmuna a din angin, theihtawpa lo inbuatsaih lawk chu a pawimawh hle a ti a. Mock drill - neih hunah pawh thil thleng anga engkim tih chu a tul hle tih sawiin hna chanpual neite theihtawp chhuah turin a chah a. Mipuite pawh mock drill- neih ni hian chiaï lo tur leh sawrkar hmalakna tha taka zawm tûrin a sàwm bawk a ni.

Mock Drill ah hian magnitude 6.1 lirnghing thleng anga chet lâk tum niin, zing dar 10 atanga tlai lam dar 6 thleng hun hman tur a ni dawn a, Lawngtlai Bazar leh Chandmary in rinaah chenna In - 7 chim leh in chimin Lawngtlai College Bus - a chim hnan anga chet tlat tur a ni dawn a ni.

(DIPR)



UNION MINISTER

Union Minister for New and Renewable Energy Prahlad Joshi chuan International Renewable Energy Agency and the Food and Agriculture Organisation, IRENA Assembly Abu Dhabi-a neih ah thu sawiin India chuan renewable energy chu agriculture nen thlun zawm a nih tur thu a sawi.

Union Minister for new and renewable energy Pralhad Joshi chuan renewable energy leh agriculture thlun zawm a ni chuan ei leh bar chhek khawl kawngah kawng tam takin hmasawn a beisei thu sawiin, thingtlang lo neitute tih chak kawngah pawh nasa taka a puih tur thu a sawi.

(NewsonAIR)

